

Elton Lioe-A-Tjam (ABO):

Ta Hulanda (Gasunie) a negocia e 'CITGO-deal' y no nos flamante gobierno

ORANJESTAD- Tin un dicho ta bisa ni con lihe e mentira ta, e berdad semper lo alcance. Tambe tin un otro cu ta bisa 'pronkia cu pluma di otro'. Wel den menos di un siman, e dos dichonan aki por wordo aplica na nos flamante gobierno y nos parlamentarianan 'Pabien'.

Diabierna pasa cu hopi tam-tam y show, pueblo por a scucha con incansablemente e minister di Energia y esun di Labor a traha pa logra un supuesto reapertura di e refineria. Sin cu parlamento a mira un documento of acuerdo di e 'CITGO-deal', tur fraccion a core lihe pa laga pueblo sa ki rol nan tabata tin den e asunto aki. Un postura populista y un postura cu ta sirbi nan interes en bes di esun di pueblo.

Te awe, ningun di e parlamentarianan 'Pabien', por splica pueblo precies kico gobierno a cumpra pa pueblo y tampoco cuanto esaki lo costa. Cu e lo costa pueblo biyones, esey ta sigur. Cu e lo ta na bienestar y interes di pueblo, nan no sa. Pero asina mes, nan tur ta 'voor'. E 'detayenan' biyonario, no ta importante pa nan. E unico cu ta conta, ta cu nan a haya un cabay di campaña. Wel, nos di partido ABO a

hay'e masha straño cu ningun informacion ta wordo duna, pero keto bay gobierno ta permiti di viola tur sorto ley pa hinca Aruba den un otro aventura 'Green'. P'esey nos a cuestiona e asunto aki for di aña pasa y nos a sigui investiga pa duna pueblo mas informacion. Aruba ta bancarota y na rudia di henter mundo awe, pa via di e triki-nan asina di partidonan tradicional cu ta pensa solamente riba nan interes y pa despues bende pueblo esaki como democracia.

Cualquier persona integro y cu dos placa di sinti, lo sa cu tras di e 'CITGO-deal' tin algo scondi. Awor ta resulta cu e motibo principal di un supuesto reapertura di e refineria, ta e gas rond di Aruba. E reapertura di refineria ta djis un 'front', manera gobierno a haci e asunto di e ceramento di e refineria uno sentimental cerca di algun hende. Hulanda via Gasunie lo core dos tuberia entre Aruba y Paraguana pa transporta gas y nafta. Un proyecto biyonario. Companianan biyonario manera Gasunie, lo no inverti den un proyecto asina, si e no tabata uno lucrativo. Bende gas na un refineria 'upgrader' pa opera 'Green', no ta logico. Gasunie, su 'core business' ta bende gas y



Gasunie kier expande su operacionnan for di Europa. Pa casualidad Repsol, cu ta di Shell (cu tambe ta di Hulanda), a descubri un pos grandi di gas y petroleo cerca di Aruba. Tambe pa casualidad e mesun Repsol ta esun cu gobierno a duna 'carte blanche' pa explora, organisa y busca companianan interesa di explora. Tur esaki bou di supervision di Utilities Aruba... hmmm. Cada biaha pueblo tin cu scucha mil y un storia di e minister di Energia dicon e no por bisa pueblo algo di

e posibel recursonan mineral den e awanan territorial di Aruba.

Wel akinan pueblo ta haya e confirmacion cu tin gas y cu Gasunie lo kier bende esaki. Djis e hecho cu un compania Gasunie ta envolvi den e proyecto di tuberia, ta confirma cu e recursonan di gas rond di Aruba mester ta grandi. Anto dicon gobierno kier sconde e informacion importante aki di pueblo? Ta pasobra nan a bende e patrimonio di pueblo aki tambe caba pa 'kruimels'? Awor pueblo ta

compronde dicon e gobiernonan di Hulanda y Venezuela mester firma e 'CITGO-deal' tambe? Ta kisas pa e 'deal' biyonario aki, señor Carvajal mester a wordo laga den libertad y no extradita?

Tambe ta interesante pa pueblo sa, cu ningun compania local lo ta un 'lead contractor', pero 'sub-contractor'. Incluso esun di e minister di Energia. Pues e famoso 'CITGO-helpdesk' di e minister di Labor, lo ta nada otro pa acumula data personal di hende y laga nan kere cu gobierno lo yuda nan haya un trabou den e refineria 'upgrader'. Ta companianan stranhero lo dicidi kende lo haya trabou.

Pues nos flamante gobierno no a negocia nada, tampoco e miembro di parlamento cu a traha incansabel pa e reapertura'. Ta Hulanda a negocia y ta Hulanda a sirbi su interes, danki na tur e politiconan tradicional cu a pone Aruba na rudia di henter mundo. Danki na e partidonan politico tradicional, cu awe tambe e recursonan mineral di Aruba a wordo regala na otro nan pa 'kruimels'. Tristo pa mira cu nan mes no a realiza cu ta 'cheerleader y decoracion' nan a bira of a daño grandi cu nan ta haci e pais aki. Pabien gobierno. Pabien parlamentarianan cu kier gaña pueblo cu pluma di otro! □